

大明太祖高皇帝御註道德真經序

朕本寒微遭胡運之天更值群雄之並起不得自安於鄉里遂從軍而保命幾喪其身而免於是乎受制不數年脫他人之所制獲帥諸雄固守江左十有三年而即帝位奉天以代元統育黔黎自即位以來固知前代哲王之道宵晝遑遑慮宵者之切鑒於是問道諸人人皆我見未達先賢一日試覽群書檢開有道德經一册因便但觀見數章中盡皆明理其文淺而意奧莫知可通罷觀之後旬日又獲他卷注論不同再尋較之所注者人各異見因有如是朕悉視之用神盤桓其書以之一己之見似乎頗識意欲試注以遺方來恐今後人笑於是弗果又久之見本經云民不畏死奈何以死而懼之當是時天下初定民頑吏弊雖朝有十人而棄市暮有百人而仍為之如此者豈不應經之所云朕乃罷極刑而囚役之不逾年而朕心減恐復以斯經細觀其文之行用若濃雲靄群山之疊嶂外虛而內實貌態彷彿其境又不然架空谷

以秀奇峯使昔有鬼戀修態成於幽壑若不知其意如入混沌鴻濛之中方乃少知微旨則又若皓月之沉澄湖鏡中之觀寶象雖形體之如然探親不可得而捫撫况本經云吾言甚易知甚易行天下莫能知莫能行以此思之豈不明鏡水月者乎朕在中宵而深慮明鏡水月形體雖如却乃虛而不實非着象於他處安有影耶故仰天則水月象明棄鏡捫身則知已象之不虛是謂物外求真故能探其一二之旨微遂於洪武七年冬十二月甲午著筆強為之辯論未知後世界契高人之志歟朕雖菲材惟知斯經乃萬物之至根王者之上師臣民之極寶非金丹之術也故悉朕之丹衷盡其智慮意利後人是特注耳是月甲辰書成因為之序

大明太祖高皇帝御註道德真經卷上

道可道非常道名可名非常名
上至天子下及臣庶若有志於行道者當行過常人所行之道即非常道道猶路也凡人律身行事心無他欲執此而行之心即路也路即心也能執而不改非常道也道可道指此可道言者蓋謂過人之大道道既成名永矣即非常之名可行焉可習焉
無名天地之始有名萬物之母
道之幽微靜無名而動有益即無極而太極是也且如吾為天下君善政之機日存於心而未發孰知何名纔施行則有賞罰焉不但君心有賞罰賢人君子有志則皆能利濟萬物所以無名天地之始即君子仁心畜之於衷發而濟萬物則有名矣豈不萬物之母云
常無欲以觀其妙常有欲以觀其微
無欲觀其妙謂道既行而不求他譽以已誠察於真理故云常無欲以觀其妙又常